

VJERSKA POUKA – MEKTEB

Vjerska pouka - MEKTEB je sistematska edukativna aktivnost usmjerena poučavanju vjernika Islamu s ciljem primjene tog učenja u praktičnom životu. Osnovni zadatak vjerske pouke je da vjernicima, kako mladim tako i starijim, saopći i pojasni osnovna učenja Kur'ana, hadisa i drugih islamskih znanosti. Odgoj i poučavanje u vjeri idu zajedno i nerazdvojni su. Znanje samo po sebi nije dovoljno, jer ga nužno treba da prati primjena. Nemoguće je nešto kvalitetno i korisno raditi bez odgovarajućeg znanja i poznavanja onoga što se želi. Ta dva elementa su neodvojiva u procesu islamske edukacije svakog muslimana pojedinačno. To znači da porodica i muallim moraju ujediniti i sinhronizirati sve svoje znanje, umijeće, volju i snagu da bi jedno mlado biće podučili i odgojili. Islamski opredijeljena porodica će svoje dijete sigurno usmjeriti na vjersku pouku od onog momenta kad sa imamom-muallimom uspostavi tijesnu saradnju i kad skupa postanu udruženi činilac u procesu odgajanja i podučavanja. Polaznika vjerske pouke ne treba samo podučiti određenom znanju, već ga treba usmjeriti i da to stečeno znanje postane njegova ljubav, način vladanja i ponašanja, da bude ponosan na ono što zna, što radi i kako živi. Djetinjstvo je nekad bilo doba u toku kojeg se dijete još u domu njegovih roditelja, pripremalo da sasvim samostalno uspješno i suvereno stupi u društvo odraslih, da preuzme dužnosti i odgovornosti života. U toku tog razdoblja džemat, zajedno sa roditeljima, štitali su ga od svega onoga što je moglo raniti njegovu osjetljivu dušu. Skoro svi faktori utjecali su na odgoj i razvitak mlade ličnosti. Danas već to nije slučaj. Sredstva javne komunikacije ne štite i ne štede mlade od loših utjecaja, već ih izlažu pritisku slobodnih i liberalnih ideja o savremenom moralu i odnosima u društvu. Mnogi problematični programi su svakodnevno i podjednako dostupni i mladima i odraslima. Zato svaki doprinos u pomoći toj mladosti koja traži svoj mir i pokušava naći svoje mjesto u svijetu je dobro došao i za svaku je pohvalu. Učestvovati u odgoju djeteta, raditi na izgradnji njegovog morala, etike, ahlaka je najčasniji zadatak. Roditelji zajedno sa svojim muallimima kroz MEKTEB to mogu uspješno ostvariti.

DANAS KREĆEM JA U MEKTEB!

Odkad idem ja u mekteb
O Islamu stalno učim
Jako mi je lijepo tamo
Nimalo se baš ne mučim


Svakog dana u mektebu
Ja naučim nešto novo
Nekad suru, nekad dovu
I arapsko neko slovo

Sve mi lijepo u mektebu
Jer sve više znanja imam
Sada učim ja polahko
Kako abdest da uzimam

Kada nešto ne razumijem
Ja imama tada pitam
Uskoro ću ako Bog da
I sufaru ja da čitam

I ja hoću u
mekteb!

Ja idem u
mekteb!



ZAŠTO TREBAM SVOJU DJECU UPISATI I DOVODITI NA VJERSKU POUKU - MEKTEB

Navikli smo da postavljamo pitanje ZAŠTO, jer hoćemo da znamo svrsishodnost, razlog ili potrebu onoga što radimo. Ako možda postavljate pitanje ZAŠTO MEKTEB ili ako se možda dvoumite biste li ili ne upisali svoje dijete u mekteb, mi vam nudimo nekoliko odgovora, koji će vam, nadamo se, pomoći da se odlučite i odbacite svaku dilemu. Tih odgovora naravno ima više a vjerujemo da su i ovih nekoliko, sasvim dovoljni da u vama prevagne odluka, **svakako upisati djecu i dovoditi na vjersku pouku – u mekteb**, zato što:

- jedna od glavnih islamskih dužnosti je podučiti svoju djecu osnovnim islamskim propisima i odgojiti ih u duhu Islama. Muhammed, a.s., je rekao: "Roditelj je obavezan prema djetetu: da mu da lijepo muslimansko ime, da ga lijepo odgoji, da ga poduči pismenosti, plivanju i odbranbenim vještinama, da ga izdržava imovinom zarađenom na dozvoljen način i da mu pomogne da se oženi, odnosno, ako je kćerka, uda kad dođe vrijeme za to."

- želim sebe i svoju djecu da sačuvam od raznih ovodunjalučkih iskušenja kao i od džehennemske vatre koja je pripremljena za one koji se ogluše o Allahove, dž.š., propise. "O vi koji vjerujete, sebe i svoje porodice čuvajte od vatre..." (Et -Tahrim, 6.)

- želim da iza sebe ostavim odgojenu djecu koja će živjeti u Islamu i upućivati dovu Allahu, dž.š., za svoje roditelje i na najbolji način čuvati uspomenu na njih. Muhammed, a.s., je rekao: "Kada čovjek umre prekida se mogućnost pristizanja sevapa za dobra djela osim u tri slučaja:

- ako je iza sebe ostavio valjano i hairli u Islamu odgojeno dijete koje mu dovu čini,
- ako je ostavio trajnu sadaku - vakuf, koji i poslije njegove smrti koristi ljudima i
- znanje kojim se ljudi koriste i poslije njegove smrti."

- želim da moja djeca upoznaju osnovne islamske propise, da razumiju smisao, potrebu i opravdanost tih propisa i da se naviknu da ih praktično primjenjuju, kako bi govorom i djelom bili istinski muslimani

-želim da moja djeca saznaju šta im je kao muslimanima halal-dozvoljeno, a šta haram-zabranjeno činiti, jer će samo ako budu radili dozvoljeno, a čuvali se zabranjenog, biti uspješni na ovom i budućem svijetu, te da nauče kakvo zlo i propast donose: alkohol, droga, prostitucija, krađa, laž, sijanje smutnje, ogovaranje itd. i da se toga čuvaju

- želim da se moja djeca druže i upoznaju sa drugom djecom, koja takođe baštine islamske vrijednosti sa svojom porodicom, te da se, kada dođe vrijeme za to, žene i udaju međusobno, jer loših primjera koji nas kao roditelje trebaju zabrinuti u ovom pogledu ima nažalost veliki broj

- želim da moja djeca izgrade privrženost prema džematu i islamskoj zajednici, prema svojoj domovini i prema svemu drugom što je napredno i humano

- svjestan sam da škole obrazuju djecu, a ne nude odgoj u islamskom duhu. Muhammed, a.s., je rekao: "Koga, kako treba, ne odgoje roditelji, odgojiće ga vrijeme." Ja neću da odgoj svoje djece prepuštam slučaju i vremenu

- želim da mi djeca budu sretni i ponosni što pripadaju ummetu Islama, a ne da se toga stide. Allah, dž.š., kaže u Kur'anu: "Naredi djeci svojoj da obavljaju namaz i istraj u tome... A samo one koji se Allaha budu bojali i grijeha klonili čeka lijep svršetak." (Taha, 132.)

- jasno mi je da u mom nastojanju da svoju djecu islamski odgojim i usmjerim najbolje može pomoći upravo ambijent vakufa, vjerska pouka-mekteb i stručna pomoć imama-muallima

CILJ MEKTEPSKE NASTAVE JE

- pružiti mladima cjeloviti vjernički pogled na svijet, s posebnim naglaskom na vjernički praktični život, a takođe i budući vječni život. Tako da na primjeren način upoznaju vlastitu vjeru u njenoj duhovnoj, moralnoj, socijalnoj, misionarskoj i drugim dimenzijama, pri čemu se izlaganje vjerskog viđenja i postojanja svijeta obavlja u veoma otvorenom i tolerantnom dijalogu s ostalim znanostima i teorijama. Način pristupa je islamsko viđenje koje obuhvata sva pozitivna iskustva ljudi, bez obzira na njihovu nacionalnu pripadnost i vjersko obrazovanje. Upoznavanje je istovremeno informativno-spoznajno i doživljajno-djelatno, s nastojanjem da se osnovne postavke sprovedu u svim segmentima života: odnos prema Bogu, prema svijetu, prema drugim ljudima i odnos prema samom sebi. Znači, cilj je vjeronauka, informativno-formativni pristup vjeri i izgradnja pogleda na svijet kroz prizmu vlastitog vjerovanja, maksimalno poštujući sve navedene datosti, a da na prihvatljiv način upozna polaznike sa sistemom islamskih vrijednosti i formira kod njih stav kako da iste primjenjuju u svim životnim situacijama i tako se ostvari Allahova, dž.š., poruka: „...zadovoljan sam da vam Islam bude vjera...” (El-Maide, 3.)

ZADACI MEKTEPSKE NASTAVE SU:

- da se kod učenika razvije svijest o Bogu kao Stvoritelju, i odnos prema ljudima kao najsavršenijim Božijim stvorenjima
- da kod učenika očuva islamski identitet, bosanski jezik i bošnjačku tradiciju
- da upozna polaznike s osnovnim islamskim propisima, osposobi ih da shvate i usvoje smisao i višestruku opravdanost njihovog propisivanja, nauče osnovne islamske dužnosti i da ih praktično primjenjuju u životu
- da im pored upoznavanja sa historijskim putem razvoja i širenja Islama, objasni značaj i ulogu svakog muslimana kao jedinke, utiče na formiranje svijesti o predanosti preko islamske zajednice ummetu Muhammeda, a.s., i razvije kod njih stav odlučnosti za njegovanje i očuvanje Islama te njegovu primjenu u svim oblicima svakodnevnog života
- da razvije i formira stav o svjesnoj i aktivnoj ljubavi prema Allahu, dž.š., opredjeljenost putu Muhammeda, a.s., i privrženost prema islamskoj zajednici, ljubav prema svojoj domovini kao i prema svemu što je korisno i dobro u životu čovjeka
- da polaznike osposobi da na osnovu savladanog gradiva i odgovarajućeg stepena znanja mogu samostalno koristiti kako islamsku tako i drugu vrstu literature
- da se kod učenika izgrade i razviju sposobnosti dubljeg razumijevanja i vrednovanja kulture i civilizacije u kojoj žive, uspona i padova u povijesti čovječanstva, kao i dostignuća u raznim oblastima naučnog djelovanja
- da se učenicima pomogne u odgovornom oblikovanju zajedničkog života s drugim, u iznalaženju ravnoteže između vlastite ličnosti i zajednice, u ostvarivanju susreta sa svijetom (sa ljudima različitih kultura, religija i pogleda na svijet, s društvom, s prirodom) i s Bogom
- da kod učenika formira i razvija osobine društvenosti kao i toleranciju, poštivanje i cijenjenje svake ličnosti, bez obzira na njeno uvjerenje
- da se učenici osposobe (na uzrastu učenika primjeren način) za postavljanje pitanja o cjelini i najdubljem smislu postojanja čovjeka i svijeta, o ljudskoj slobodi, životu u zajednici, smrti, odnosu sa prirodom koja nas okružuje, kao i za razmišljanje o tim pitanjima u svjetlu vjere Islama.

IKB - VAKUF

**Vjerska pouka - MEKTEB
SUBOTOM**




- | | |
|--------------------|-----------------|
| 1. Sufara | 11:30 – 12:30 h |
| 2. Kur'an 1. grupa | 12:45 – 13:45 h |
| 3. Kur'an 2. grupa | 14:00 – 15:00 h |
| 4. Hifz | 15:00 – 16:00 h |
| 5. Tedžvid | |
| • za muškarce | 17:00 – 18:30 h |
| • za žene | 17:00 – 18:30 h |

**Vjerska pouka - MEKTEB
NEDJELJOM**

11:30 do 12:30 h
12:30 do 13:30 h

Islamisches Kulturzentrum der Bosniaken in Berlin e.V.
Islamski kulturni centar Bošnjaka u Berlinu
Adalbertstraße 94.
10999 Berlin

www.ikc-berlin.de

	+49 30 695664-40	Radno vrijeme:
	+49 30 694664-44	Po – Če 12⁰⁰ – 20⁰⁰
	kontakt@ikc-berlin.de	Pe – Su 11⁰⁰ – 20⁰⁰
		Ne 10⁰⁰ – 20⁰⁰

DRAGA DJECO, OČEKUJEMO VAŠ DOLAZAK. VAŠI MUALLIMI.